



Sud Bosne i Hercegovine
Суд Босне и Херцеговине

Broj: S1 3 Iž 039131 20 Iž
Sarajevo, 14.12.2020. godine

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi Naše stranke, Branilaca Sarajeva 5/1, Sarajevo zastupana po predsjedniku Predragu Kojoviću, koja osporava Odluku Centralne izborne komisije BiH o odbijanju zahtjeva za ponovno brojanje glasačkih listića u osnovnoj izbornoj jedinici Centar Sarajevo za nivo Općinskog vijeća, broj 05-1-07-1-1363/20 od 07.12.2020. godine, u nejavnoj sjednici, održanoj dana 14.12.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum u uvodu, odbijen je kao neosnovan zahtjev političkog subjekta Naša stranka za ponovno brojanje glasačkih listića na dva biračka mjesta 136A06 i 136A069 u osnovnoj izbornoj jedinici Centar Sarajevo.

Protiv ove odluke žalitelj SP je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH paušalno odbijen, jer da nije utvrđeno da je birački odbor učinio propuste koji su direktno uticali na raspodjelu mandata unutar kandidata na listi ove političke stranke.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, ispitala sve navode zbog podnesenog zahtjeva za ponovno brojanje i pravilno utvrdila da nisu nađene nepravilnosti koje mogu uticati na rezultate glasanja u osnovnoj izbornoj jedinici Centar Sarajevo, koji se odnose na plasman kandidata NS,

podnosioca žalbe. Kako nalazi i ovo vijeće Suda Bosne i Hercegovine, CIK BiH je pravilno utvrdila činjenično stanje i donijela pravilan zaključak o tome da u zahtjevu za ponovno brojanje, koji je pravilno odbila, jer nisu navedeni opravdani razlozi za ponovno brojanje glasačkih listića u predmetnom slučaju. Takva ocjena proizilazi iz činjenice da u zahtjevu nije naveden približan broj glasačkih listića za koji se tvrdi da nisu ispravni, tj. Suprotni odredbi člana 5.30 stav (4) tačka 3) Izbornog zakona BiH. Pored toga, u zahtjevu nije ni navedeno kako povreda Izbornog zakona utiče na rezultate izbora u smislu pravilne primjene odredbe člana 5.30 stav (4) tačka 4) Izbornog zakona BiH. Navod da 7 kandidata ove stranke prelazi prag od 10% ne može se smatrati dokazom koji ukazuje na približan broj glasačkih listića za koji se osnovano sumnja da nisu ispravni niti se takav navod može podvesti pod standard „povrede Zakona koja bitno utiče na izborni rezultat.“

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Zvezdana Antonović